

Tuesday, July 29, 2025

Time - 2:30pm

ZPM PRESS CONFERENCE

ZPM Spokesperson Pu K. Laltluangkima'n tunhnaia sawhthing dah tawih tam tak a awm nia sawi chu sawhthing hralh tlak leh hralh tlak loh thliarna lama tha lo zual paih te an ni tih an sawi.

Vawiina Aizawl Press Club a thuthar thehdarhtute an kawmnaah ZPM spokeperson Pu K. Laltluangkima chuan tunhnaia sawhthing dah tawih tiha an sawi chu sawhthing hralh tlak leh hralh tlak loh thliarna lama tha lo zual an paih te anih thu a sawi a, Thlai thar chu sawngbawl a ngai thin a, loneituten a chia leh a tha an dah pawlh chuan, lo thenfai a ngaih thin tih a sawi bawk.

ZPM Spokesperson chuan eptu party te chu sawrkar hmalakna apiang sel ngawt loa kuthnathawktute tana a tha tura sawrkar ruahman na ah sawrkar thlawp turin a duh thu a sawi a, Sawhthing avangin kuthnathawktu tam takin hlawkna an tel thei tih sawiin mi tam zawk khai chhuah theih zel an in beisei tih an sawi bawk.



NEP

Union Ministry of Education chuan National Education Policy NEP kum nga tlin pualin Akhil Bharatiya Shiksha Samagam 2025 a huaihawt. National Education Policy hi kum 2020 July ni 29 khan bul tan a ni a. NEP avang hian ramchhung zirna kalphung chuan bung thar a kai a. Insiamthatna leh ngaihtuahna thar nen ramchhunga zirna dinhmun siamthat chhoh mek a ni. National Education Policy pual hian Akashvani Aizawl Regional News Unit chuan hemi chungchang sawihona hun a buatsaih a, vawiin tlai dar 4:30 leh dar 5 inkarah he sawihona hi Akashvani Aizawl Primary Channel ah ngaihthlak theih a ni dawn a, AIR News Aizawl Youtube channel ah pawh ngaihthlak theih a ni bawk ang.



BIOMETRIC

Vawiin khan DC Conference Hall, Keifangtlangah Myanmar atanga raltlan biometric lak chungchang sawiho a ni.

Thutkhawma tarlan danin Raltlan hi Champhai district ah mi 13,586 an awm nia hriat a ni a, heng biometric hi mamawh huna raltlan awm zat hriat nan ruahman a ni. Home Department hnen atangin biometric lak nana hmanrua dawn tawh a ni a, tema din niin heng team hian Champhai khaw chhunga veng hrang hrangah kal kualin an la khawm dawn a ni. Team member te DC Office leh SP Office atangin ruat an ni a, naktukah hian inhrilhhriatna leh inzirtirna pek a ni ang a, July ni 31 hian Champhai Vengthlang, Kanan Veng leh Dinthar Veng atangin tan a ni ang. Raltlan awm zat Champhai VC te'n an thehlut ang a, team hrang hrang chuan veng an tlawh chhuak ang a, an kal ni tur te ruahman fel a ni ang. Champhai DC Pu Mohammad Aaquib chuan pisa hrang hrang atanga team-a tel turte tha takin ruahmanna an kalpui theih ngei a rin thu a sawi a, khawtlang hruaitu hrang hrang - VC te, YMA te leh MHIP te thawhpaina tha tak nei turin a sawm bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Zanin dar 6 leh a chanve-ah Chanchinthar puan leh a ni ang.



COMMERCE & INDUSTRIES MINISTER

Commerce & Industries Minister Pu F. Rodingliana'n Mizoram sorkarin District tinah ICU khum dah vek turin hma an lak thu a sawi.

NITI Aayog hnuaia Aspirational Block te hmasawwna tura inelna 'Sampoornata Abhiyan'-a Ngopa block atanga hnathawk thate lawmpuina hun 'Sampoornata Abhiyan Samman Samaroh', Saitual Auditorium-a neih a hmanpuinaah he thu hi sawiin Commerce & Industries Minister chuan NITI Aayog-in Aspirational Block te hmasawwna tura inelna - Sampoornata Abhiyan a buatsaihah Ngopa RD Block chu a ti

tha ber leh Mizorama NITI Aayog tehfung paruk (6) te tihlawhtling vek thei Aspirational Block awm chhun a ni chu lawmawm a tih thu a sawi a, Ngopa block chu block hnufual, chawikan ngai aspirational block a ni reng tur a ni lo, tih sawiin, he dinhmun atanga tal chhuak tur chuan kil tinah tanho a ngaih thu a sawi.

Minister Pu F. Rodinglana chuan Ngopa damdawi in (CHC) leh Quarter sak thatna tur pawisa sorkar atangin a awm tawh tih a sawi a, hna chu tan mai theih a ni tawh tih sawiin, hei bakah hian Mizoram sorkar chuan District tinah ICU khum dah vek turin hma an la bawk tih a sawi. Tualchhung kutkawih zawrh chhuahna hmun tur Mall lian MINECO, Aizawlah sa turin hma a la mek tih a sawi a, an tihputlin theih chuan Mizoram hmun kilkhawr bera tualchhung kutchhuakte phochhuahna tur tha tak a ni thei dawn tih a sawi a ni.



DRUGS SEIZED

Excise & Narcotics Department chuan Methamphetamine Kg 14.443 manin, he thubuaia inhnamhnawih mi pahnih an man bawk.

Excise & Narcotics Department hian July ni 27 khan New hruaikawn Road, Champhai District-ah ruihhlo hi manin a neitua puh Laldawnglana (kum 37) Zokhawthar, Champhai District-a khawsa nia inchhal chu an man a, he thubuaia inhnamhnawiha puh tho B. Lalchhuanpuia (kum 26) Zion veng, Champhai chu Sapianmaksak kawn, Zokhawthar kawng-ah an man tih thuchhuah an siamah an tarlang bawk.

Heng mite hi thubuai siamsak nghalin nimin khan District & Sessions Court, Champhai-ah an hruai nghal a ni.



ROAD INSPECTION

Lirthei hmanga eizawng pawl 14-in Mizoram chak lakna kawngpui chhia dinhmun an enfiah a, an kal zel dan tur naktuk Nilainiah an rel dawn.

Lirthei hmanga eizawng pawl hian kar kalta Thawhlehnia an rorel bawhzuiin, nimin khan Mizoram chak lakna kawngpui chhia siam mek dinhmun hi an enfiah a, Langkaih kawng, Sairang leh Kawnpui inkar leh Kolasib leh Bairabi inkar kawng chhia siama Mizoram Sorkar leh HNIDCL hmalak dan an enfiah a ni. Hnathawh dan an enfiahnaah hian kawng chhe lai chu khawih ni mah se, an duhthusam erawh a nih loh thu an sawi a, hnathawktu leh khawl an tlem bakah lirthei chevel thununna, traffic management a that loh avangin lirthei tam tak an la tang tih sawiin, an kal zel dan tur chu Nilainiah joint meeting koin an rel dawn tih an sawi.

